

靖海紀

一

御製褒章

海氛之不靖鯨鱣出沒波濤震驚濱海居
民魚鹽蠶織耕穫之利咸失其業朕心恆
閔惻焉邇者滇黔隴蜀湖湘百粵悉皆底
定敕寧藁爾臺灣阻險負固爾施琅銜命
徂征決策進取樓船所指將士一心遂克
島門殲其營窟勇以奪其氣誠以致其歸
捷書到闕時值中秋對此佳辰欣聞凱奏

念瀛壖赤子獲登衽席用紆南顧之憂惟
爾丕績卽解是日所御之衣馳

賜載褒以詩


島嶼全軍入滄溟一戰收降帆來蜃市露
布徹龍樓上將能宣力奇功本伐謀伏波
名共美南紀盡安流

康熙二十二年九月初九日

廣運

御筆

之寶



兵部爲欽奉

上諭事康熙二十二年九月初十日奉

上諭諭吏兵二部向來海寇竄踞臺灣出沒島

嶼窺伺內地擾害生民雖屢經勦撫餘孽

猶存沿海地方烽煙時警邇者滇黔底定

逆賊削平惟海外一隅尚梗王化爰以進

勦方畧咨詢廷議咸謂海洋險遠風濤莫

測長驅制勝難計萬全朕念海氛不靖則

沿海兵民弗獲休息特簡施琅爲福建水
師提督前往相度機宜整兵征進該提督
忠勇性成韜鈴夙裕兼能洞悉海外形勢
力任尅期可奏蕩平遂訓練水師整頓戰
艦揚帆冒險直抵澎湖鏖戰力攻大敗賊
衆克取要地立奏膚功餘衆潰遁臺灣懾
服兵威乞降請命已經納土登岸聽候安
插自明朝以來逋誅賊寇始克殄除瀕海

遠疆自茲寧謐此皆該提督矢心報國大
展壯猷籌畫周詳布置允當建茲偉伐宜
需殊恩施琅着加授靖海將軍封爲靖海
侯世襲罔替以示酬庸前進勦雲南官員
曾各加一級兵丁賞賚一次頃因該提督
所統官兵出海進勦勤勞堪念已經照雲
南例加級賞賚復思官兵遠抵海疆冒險
勦寇非滇黔陸地用兵可比在事官員着

再各加一級兵丁再賞一次以示特加優
渥至意爾二部卽遵諭行特諭

封侯制誥

奉

天承運

皇帝制曰朕惟尚德崇功國家之大典輪忠
盡職臣子之常經古聖帝明王戡亂以武
致治以文朕欽承往制甄進賢能特設文
武勲階以彰激勸受茲任者必忠以立身
仁以撫衆智以察微防姦禦侮機無暇時

能此則榮及前人福延後嗣而身家永康
矣敬之勿怠爾施琅先任水師提督時同
總督李率泰總統水師官兵進剿海賊克
取廈門金門銅山等島著有勞績海寇竄
踞臺灣出沒島嶼窺伺內地擾害生民雖
屢經剿撫餘孽猶存烽煙時警嚮者滇黔
底定逆賊削平惟海外一隅尚梗王化應
行剪滅永奠海疆爰以進剿方畧咨詢廷

議咸謂海洋險遠風濤莫測長驅制勝難
計萬全朕念海氛不靖則沿海一帶地方
民鮮幹止之樂兵有征調之繁計切安全
用彰天討以爾忠勇性成韜鈴夙裕兼能
洞悉海外形勢特簡爲福建水師提督前
往相度機宜整兵征進爾克承簡命力任
尅期可奏蕩平遂訓練水師整頓戰艦揚
帆冒險克取花嶼貓嶼草嶼八罩將軍澳

南大嶼東西吉直抵澎湖克取虎井桶盤
嶼西嶼頭牛心灣內外暫峙內雞籠嶼四
角山風櫃尾娘媽宮案山仔紅毛城林投
仔暗湧竹竿灣龍門港龜壁港赤嵌嶼小
門嶼吉貝嶼馬鞍嶼吼門雁靖嶼中墩嶼
蟬仔嶼北山嶼烏嶼香爐嶼大小烈嶼等
三十六島鏖戰力攻大敗賊衆殺賊一萬
四千餘名招撫僞將軍果毅中鎮楊德等

一百六十五員賊衆四千八百餘名因克
取澎湖等要地餘衆潰遁臺灣懾服兵威
鄭克塽乞降請命納土歸誠自明朝以來
逋誅積寇始克殄除海外遐陬歷代未隸
疆索自茲初闢悉入版圖此皆爾矢心報
國大展壯猷籌畫周詳布置允當建茲偉
伐宜沛殊恩封爾爲靖海侯世襲罔替

制 誥

康熙二十二年九月初十日

之 寶

贈宮傅制誥

奉

天承運

皇帝制曰人臣奏開闢之勲謀猷克壯國家
錫報功之典品秩加崇惟懋績樹乎師中
斯寵命榮於身後爾原任太子少保靖海
將軍靖海侯福建水師提督施琅夙諳兵
事久歷軍行壯歲從戎卽著干城之望巖

疆分鎮聿推保障之才洎乎受律中朝建
麾全閩兵民藉以綏輯而斥埃無驚將士
樂其拊循而簡稽有法念茲勞動奄爾淪
徂宜沛殊恩俾加顯秩茲贈爾太子少傅
光祿大夫於戲抒誠報國式膺三命之榮
班爵酬庸用慰九原之志尚承渥澤永賁

泉壚